
Lescha d'uffants e da giuvenils dal Grischun (LUG)

Dals [Data]

Relaschs tangads da questa fatschenta (numers dal DG)

Nov: **548.400**

Midà: —

Aboli: —

Il Cussegl grond dal chantun Grischun,

sa basond sin l'art. 31 al. 1 da la Constituziun chantunala,
sunter avair gi invista da la missiva da la Regenza dals ...,

concluda:

I.

Il relasch "Lescha d'uffants e da giuvenils dal Grischun (LUG)" DG [548.400](#) vegn
publitgà sco nov relasch.

Art. 1 Intent e finamira

¹ Questa lescha serve a sviluppar vinavant la promoziun e participaziun d'uffants e giuvenils ordaifer la scola e contribuescha a lur protecziun.

² Ella ha la finamira, ch'ils uffants e giuvenils:

- a) vegnan promovids en lur svilup ed en lur bainstar corporal e spiertal;
- b) pon s'integrar socialmain, culturalmain e politicamain, cundecider e sa participar a la convivenza sociala;
- c) obtegnan pass per pass independenza, autonomia e responsabladad sociala;
- d) vegnan protegids cunter periclitaziuns da lur bainstar corporal e spiertal.

³ Uffants e giuvenils èn las persunas fin a lur anniversari da 25 onns, ch'èn domiciliadas en il Grischun.

Art. 2 Object

¹ Questa lescha regla en il sector da la promoziun e participaziun ordaifer la scola sco er en il sector da la protecziun d'uffants e giuvenils:

- a) la planisaziun e coordinaziun da las differentas mesiras;
- b) las activitads e purschidas da cussegliaziun dal chantun;
- c) la promoziun da purschidas e projects;
- d) las incumbensas e la promoziun da las vischnancas.

Art. 3 Planisaziun e coordinaziun

¹ Il chantun fa in'analisa dal basegn ed elavura sin basa da quella la planisaziun strategica da las mesiras per la promoziun e participaziun ordaifer la scola sco er per la protecziun d'uffants e giuvenils.

² En l'elavuraziun vegnan includids uffants e giuvenils, las vischnancas sco er organisaziuns privatas.

³ Il chantun coordinescha las mesiras e l'organisaziun. La Regenza po engaschar gremis da coordinaziun per quest intent.

Art. 4 Cussegliaziun tras il chantun

¹ Il chantun cusseglia organisaziuns privatas e vischnancas en connex cun lur activitads en il sector da la promoziun e participaziun d'uffants e giuvenils ordaifer la scola.

² En il sector da la protecziun d'uffants e giuvenils metta il chantun a disposiziun purschidas per cusseglia persunas spezialisadas e da referiment che han in contact regular cun uffants e giuvenils.

Art. 5 Posts da consultaziun e da cussegliaziun

¹ Il chantun po conceder contribuziuns a posts da consultaziun e da cussegliaziun, ch'èn accessibels per telefon u online, per l'emprim contact en connex cun differentas situaziuns da problems da, tranter u en contact cun uffants e giuvenils.

Art. 6 Organisaziuns privatas

¹ Il chantun po conceder contribuziuns ad organisaziuns privatas per purschidas e projects da la promoziun e participaziun d'uffants e giuvenils ordaifer la scola, sche tals:

- a) han in effect chantunal u surregional;
- b) han il character da model; u
- c) èn spezialmain innovativs.

² Ad organisaziuns privatas po il chantun conceder contribuziuns a favur da purschidas da prevenziun e da sensibilisaziun per la protecziun d'uffants e giuvenils.

Art. 7 Vischnancas

¹ Las vischnancas èn cumpetentas per la promoziun e participaziun d'uffants e giuvenils ordaifer la scola sco er per stabilir, sviluppar vinavant e coordinar las mesiras respectivas sin plaun communal e regiunal.

² A las vischnancas po il chantun conceder contribuziuns da fin a 50 pertschient dals custs imputabels per stabilir e sviluppar vinavant purschidas e projects.

Art. 8 Ulteriuras disposiziuns

¹ Sin contribuziuns tenor questa lescha n'exista nagin dretg legal. Ellas vegnan concedidas en il rom dals credits ch'èn vegnids deliberads en il preventiv.

² Cunter decisiuns d'emprima istanza dal departament davart contribuziuns poi vegnir fatg recurs tar la Regenza. Las decisiuns da recurs dal departament e da la Regenza concernent contribuziuns èn definitivs.

³ L'execuziun da questa lescha è chausa dal chantun e da las vischnancas, uschenavant che incumbensas èn vegnidas transferidas a talas.

⁴ La Regenza relascha las disposiziuns executivas necessarias. Il chantun po surdar incumbensas executivas a terzs.

II.

Naginas midadas en auters relaschs.

III.

Naginas aboliziuns d'auters relaschs.

IV.

Questa lescha è suttamessa al referendum facultativ.

La Regenza fixescha il termin da l'entrada en vigur da questa lescha.